



Ақмешіт

21 мамыр
сейсенбі
№40 (2050)
2024 жыл

апталығы

Газет
1994 жылдың 15 сәуірінен
бастап шығады

• Қалалық қоғамдық-саяси әлеуметтік-
ақпараттық тарихи-танымдық газет •
E-mail: akmeshit.kz@mail.ru

Алтай мен Атырау арасындағы ұланғайыр атырап төріндегі тұлпарлар дүбірі толастаған емес. Ел басына күн туса, ер тоқымын жастанып, етігімен су кешер жігіттердің ауыздығымен су ішер сәйгүліктері де саптағы сарбаздай сай. Еліміздегі «Ұлы дала жорығы – 2024» марафон-бәйгесі тарихта қазақпен бірге жасасқан жаңуардың да тектілігін, ұзақтыққа ептілігін сынайды. Биылғы додаға барлығы 19 команда қатысты. Бірінші кезеңде ә дегеннен суырылып алға шыққан Шығыс Қазақстанның шабандоздары жеңімпаз атанды.

ТҮЛЕКТЕР МЕРЕКЕДЕН ҚАҒЫЛМАЙДЫ

Санаулы күннен соң еліміздегі оқу орындарын 186 мың оқушы бітіріп шығады. Қолына куәлік алып, армандарға қол созып, биік шыңдарға көз тігеді. Кеуде сарайындағы асқақ мақсаттарға қанат қағады. Әйтсе де бүгінгі күнге дейін биыл бітіру кеші болмайды деген жаңалық олардың көңілін су сепкендей басқан. Таяуда сала министрлігі бұл мәселеге нүкте қойды.

4-БЕТТЕ



21 МАМЫР – МӘДЕНИЕТ ЖӘНЕ ӨНЕР ҚЫЗМЕТКЕРЛЕРІНІҢ КҮНІ

МӘДЕНИЕТТЕ МӘНДІ, ӨНЕРДЕ ӨРЕЛІ ІСТЕР БАР

Биыл өңірдегі мәдениет саласында тың жаңалықтар жетерлік. Бірқатар нысандар ашылып, пайдалануға берілді. Мұнан бөлек, халықаралық деңгейдегі айтулы шараларда да Сыр өнерпаздары өнер көрсетіп, құрмет пен көшеметке ие болды. Мереке қарсаңында мәдениет пен өнер саласындағы елеулі өзгерістерге қысқаша тоқталғанды жөн көрдік.

– «Ел іші – өнер кеніші» деген аталы сөз қашан да өз мәнін жоймақ емес. «Сыр елі – өнер ордасы» деген атымыз бар. Жыл басынан бері ҚР Мәдениет және ақпарат министрі А.Балаеваның қатысуымен заманауи 1000 орындық Өнер орталығы пайдалануға берілді. Халықаралық «Түрксой ұйымының шешімімен Сыр өңіріне түркі дүниесінің «Ең үздік мәдени аймағы» номинациясы берілді. Ақпан айынан бастап облыстағы 171 мәдениет үйі мен клубтарда 7 бағыт бойынша «Адал адам – мәдени-тәрбие орталығы» тұжырымдамасы жүзеге асырылуда. Одан бөлек, Әйтеке бидің туғанына 380 жыл толуына арналған «Әділ сөздің алдаспаны» атты тұңғыш республикалық командалық айтыс өткізілді. Әрине, бұл – бір бөлігі ғана. Әрбір күні мәдениет пен өнермен байланысы бар Сыр халқында мұнан өзге де сан түрлі жетістіктер бар. Әріптестерімді кәсіби мерекемен құттықтаймын, – дейді Қызылорда облысының мәдениет, архивтер және құжаттама басқармасының басшысы Мира Қазбекова.

Әлем суретшілерінің басын қосқан «Қылқаламда мәңгілік ел бейнесі» атты халықаралық суретшілер симпозиумы да өңірдің абырой-беделін арттырған іс-шаралардың бірі. Сондай-ақ облыстық тарихи-өлкетану музейі ҚР Ұлттық музейінде «Қазақ даласындағы Оғыз тарихи мұрасы», «Ғасырлар руханияты» атты көрме ұйымдастырса, Н.Бекежанов атындағы қазақ академиялық музыкалық драма театры халықаралық «ТҮРКСОЙ» ұйымының арнайы шақыруымен Түркия елінің Анкара қаласында, облыстық филармония өнер ұжымы Өзбекстан Республикасы Науаи қаласына шығармашылық сапармен барды. Ал жыраулар мекеніне айналған өңірдің төрінен «Жыраулар үйі» де өнерпаздар мен көрермендерге есігін айқара ашты. Облыстың 7 ауданында музей, кітапхана, архив, неке кино залы, ардагерлер, аналар және жастар орталықтарын біріктіретін типтік үлгідегі «Руханият» орталықтарының іргетасы қалануда.

Д.ҚЫРДАН



«ҰЛЫ ДАЛА ЖОРЫҒЫ»: ТҮЛПАРДЫҢ ДҮБІРІ – ТҰТАС ЕЛДІҢ АЙБЫНЫ

«Ұлы дала жорығының» қатысушылары Павлодар маңындағы «Атамекен» елді мекенінен Екібастұзға бағыт алды. Айта кетейік, атақты академик Қаныш Сәтбаевтың туғанына 125 жыл толуына арналған іс-шара бұл. Тұлпарсүйер жұртшылықтың табанын бір топырақта тосатын айтулы додаға жалпы ұзақтық – 500 шақырым. Дәлірек айтқанда, Павлодар, Ақмола облыстарын қамтымақ. Ал марафоны 23 мамырда Есілдей ерке өзенінің жағасындағы ел астанасы – Елорда төрінде кесіледі.

Дүбір көрсе, тыпырып тұра алмайтын жылы мінез қатысушылар жарыс жолының алғашқы 100 шақырымын бағындырып, Екібастұз топырағына табан тіреген болатын. Жеңімпаздар көшін бастаған Шығыс Қазақстан облысының командасынан кейінгі орында Маңғыстау облысының шабандоздары тұр. Ал Солтүстік Қазақстан облысының серілері үздік үштікті түйіндеді. Өттеген-айы сол, Алматы облысы мен

Шымкент қаласының командаларымен қатар, біздің Сыр шабандоздары да алғашқы кезеңде-ақ түрлі себептермен жарыс жолынан тайды. Бұл ретте жарысты әу бастан бақылап отырған бас төреші Надежда Купцова: «Аттардың шама-шарқын бағамдаған шабандоздар сәйгүліктерін кинамай, дер кезінде жарысты тоқтатқандары дұрыс шешім болды», – деп баға берді. Әрине, әр өңірдің табиғаты әркілі. Жерсінбеген тұлпарға бұл жағдайлар кері әсерін тигізуі де өлден мүмкін. Құмшауыт жермен жүріп үйренген жануар тастақты жерде қиналуы ғажап емес. Мұның барлығы жарыс жолында ескерілетін нәрселер. Осы ретте айта кеткен жөн, осы кезеңде Батыс Қазақстан және Солтүстік Қазақстан облыстарының командаларынан екі аттан жарамай қалса, Абай облысының бір сәйгүлігі жарыс жолынан шықты. Кеше 20 мамырда 2-кезеңде 16 команда қайта атқа қонды.

4-БЕТТЕ

ЖАЙЛЫ ҚАЛА ҚАНДАЙ БОЛАДЫ?

Биыл еліміздегі мәслихаттардың құрылғанына 30 жыл толуына орай «Халыққа қолайлы инфрақұрылым. Жайлы шаһар жасау бастамалары» тақырыбында семинар-кеңес өтті. Оған республиканың сегіз өңірінен келген қалалық мәслихат төрағалары мен депутаттары қатысты.



Ақтау, Орал, Ақтөбе, Тараз, Талдықорған, Көкшетау, Семей, Павлодар қаласынан келген халық қалаулылары ең алдымен қала әкімі Серік Қожаниязовтың қабылдауында болды. Шаһар басшысы қаланың даму барысына тоқталып, өзара пікір алмасты. Мұнан соң семинар-кеңес өтті. Жиынға қалалық мәслихат төрағасы Ибадулла Құттықожаев төрағалық етті.

Қызылорда қаласы әкімінің орынбасарлары Дархан Тұрсынбаев, Айдос Кентұаев «Қызылорда қаласының әлеуметтік-экономикалық даму бағыттары туралы», Қызылорда қаласының сәулеттік келбетін жаңғырту, «Дизайн код» жобасы жайында және облыстық мәслихаттың тұрақты комиссия төрағасы Балжан Шәменовна «Бюджетті жоспарлау, орындауын бақылау» мәселесі бойынша баяндама жасады.

2-БЕТТЕ

Киберқауіпсіздік – ақпараттық жүйелерді кибершабуылдардан, цифрлық қауіптердің басқа түрлерінен қорғауды қамтамасыз етуге бағытталған қызмет. Цифрлық әлемдегі киберқауіпсіздіктің маңызы зор, себебі біздің өміріміз цифрлық технологиялар мен интернетке тәуелді.

КИБЕРӘЛЕМ ҚҰПИЯСЫ НЕМЕСЕ ӨЗІМІЗДІ ҚОРҒАЙ АЛАМЫЗ БА?

Киберқауіпсіздіктің негізгі қатерлеріне вирустар, трояндық аттар, фишинг, шпиондық бағдарламалар және сервистік шабуылдар жатады. Бұл қауіптерден қорғау үшін түрлі әдіс қолданылады, соның ішінде антивирустық бағдарламалық қамтамасыз ету, желіаралық қалқандар, шабуылдарды анықтау және алдын алу жүйелері, деректерді шифрлау үшін криптографиялық технологиялар пайдаланылады.

Ranking.kz ақпараттық порталының 2023 жылғы мәліметіне сүйенсек, ұлттық киберқауіпсіздік индексі бойынша елдер рейтингінде Қазақстан әлемде 176 елдің ішінде 78-орында. ҚР индексі максималды 100% ішінен 48,05%, ал халықтың цифрлық даму деңгейі 60,18%-ға жетті. Ұлттық киберқауіпсіздік индексі елдердің киберқауіптің алдын алуға және киберқауіпті басқаруға дайындық деңгейін анықтайды.

4-БЕТТЕ



«Апталықтар» қолжазба

